

## PROSLAVA 150 - GODIŠNJICE HUMBOLDT UNIVERZITETA U BERLINU

U novembru 1960. godine navršila se 150. godina postojanja berlinskog univerziteta, koji danas nosi ime braće Wilhelma i Alexandra Humboldta, i 250. godina postojanja Charité – kasnijeg Medicinskog fakulteta. U vezi s tim značajnim jubilejom organizirane su između 6. i 20. novembra na Humboldt univerzitetu velike svečanosti i simpoziji, kojima su prisustvovali i mnogi gosti iz stranih zemalja.

Centralne svečanosti su započele u Berlinu 6. XI otvaranjem veoma zanimljive izložbe »Humboldt univerzitet u prošlosti i sadašnjosti«. Iza toga je za cio univerzitet otvoren konferencije i simpozije prof. K. Hager predavanjem »Humanizam i nauka«.

Najzanimljiviji dio proslave bile su svakako priredbe pojedinih fakulteta i to: Filozofskog, Matematsko-prirodoslovnog, Pravnog, Ekonomskog, Pedagoškog, Teološkog, Medicinskog, Veterinarskog, Poljoprivredno-vrtlarskog, Šumarskog i Radničko-seljačkog fakulteta.

Kao gost Humboldt univerziteta prisustvovala sam djelomično simpozijima Poljoprivredno-vrtlarskog fakulteta u Berlinu, a djelomično Šumarskog fakulteta u Eberswalde.

\* \* \*

Razvoj poljoprivredne nastave i početak poljoprivrednih znanosti u Njemačkoj je u najužoj vezi sa ličnošću dra medicine Albrechta Daniela Thaera. Oduševljen naprednom poljoprivredom Engleske osnovao je A. Thaer koncem XVIII stoljeća prvi poljoprivredno-nastavni institut u Njemačkoj (Celle), a zatim 1806.

u širem opsegu u Möglinu. Institut u Möglinu je 1819. pretvoren u Poljoprivrednu akademiju. U to doba osnovano je u Njemačkoj niz poljoprivrednih akademija, a poslije 1810. osnovan je univerzitet u Berlinu. Uskoro zatim, a u sklopu Filozofskog fakulteta, obrazovana je katedra za poljoprivredu sa A. Thaerom u svojstvu profesora. Interesantno je, da je A. Thaer već tada znanje o poljoprivredi podvrgao ekonomskim principima u vezi sa produkcijom u praksi. Godine 1859. osnovan je u Berlinu još i Poljoprivredni institut, koji nije pripadao univerzitetu. On je 1881. spojen sa Poljoprivrednim muzejom u Visoku poljoprivrednu školu. Visoka poljoprivredna škola i Visoka veterinarska škola ujedinjene su 1934. u Poljoprivredno-veterinarski fakultet i spojene sa univerzitetom. Pošto su na tadašnjim drugim njemačkim univerzitetima bili poljoprivreda i veterina samostalni fakulteti, ta dioba je i u Berlinu provedena 1937. Istovremeno je proširen Poljoprivredni fakultet za odjel vrtlarstvo, čime je omogućeno obrazovanje vrtlarskih inženjera.

Danas studij na Poljoprivredno-vrtlarskom fakultetu u Berlinu traje pet godina i ima pet odsjeka i to: 1. za poljoprivredu, 2. za vrtlarstvo, 3. za vrtnu i pejzažnu arhitekturu, 4. za ribarstvo i 5. za tehnologiju životnih namirnica i vrenja. U posljednjem odsjeku postoji usmjerivanje za tehnologiju vrenja, 2. mljekarstvo, 3. tehnologiju šećera, 4. konzerviranje voća i povrća i 5. konzerviranje mesa i riba.

\* \* \*



Pogled na glavnu zgradu Humboldt univerziteta u Berlinu



Rad i svečanosti na Poljoprivredno-vrtlarskom fakultetu odvijale su se u vremenu od 7. do 18. XI 1960. Svečano otvorenje i pozdrav povodom 150. godišnjice održao je prof. dr Schmidt uz predavanje sa diskusijom pod naslovom »Razvoj radnih i životnih prilika na selu u procesu socijalističkog preobražaja poljoprivrede«.

Iza toga je započela rad konferencija pod natpisom »Razvoj produkcije i prilika u poljoprivredi Njemačke Demokratske Republike pri sadašnjem stanju nauke i tehnike«. U vezi s navedenom temom organizirano je pet radnih grupa u kojima je nastavljen rad ovim redom:

Prva radna grupa pod vodstvom prof. dra Sennewalda tretirala je probleme zadružnog rada u socijalističkim poljoprivrednim poduzećima Njemačke Demokratske Republike.

Druga radna grupa na čelu s prof. drom Teimpelom obrađivala je probleme poljoprivrednih produkcionih zadruga u Njemačkoj Demokratskoj Republici, te mogućnosti optimalnog korišćenja nauke i tehnike u ratarstvu.

Treća radna grupa razmatrala je pod predsjedavanjem prof. dra Liebensberga probleme poboljšanja kvalitete i produkcije u stočarstvu.

Četvrta radna grupa koju je vodila prof. dr Classen bavila se problemom socijalnog i kulturnog preobražaja sela s posebnim naglaskom na kvalificiranje radnika i zdravstveno stanje u selu.

Peta radna grupa obrađivala je pod vodstvom prof. dra Krümmela probleme socijalističkog preobražaja voćarskog područja Havel s osobitim obzirom na stanja, vrste i razdiobu sorti.

U sklopu konferencije održano je i više stručnih jednodnevnih ekskurzija i to: 1. u poljoprivrednu za-

drugu »Jedinstvo« u Rogäsenu kod Brandenburga; 2. u Institut za mehanizaciju njemačke Akademije nauka u Potsdam (Bornim); 3. u Institute za ozelenjivanje i Institute za povrćarstvo u Grossbeernu.

Nadalje, u Seelowu održana je javna sjednica Savjeta fakulteta. Iza toga je slijedio izvještaj o suradnji između Poljoprivredno-vrtlarskog fakulteta i okruga Seelow te znanstvena sjednica o ulozi Poljoprivredno-vrtlarskog fakulteta pri razvoju okruga Seelow u uzorno povrtlarsko povrće.

U toku svečanosti održane su u predvorju fakulteta počasne promocije, a pred statuom dra A. Thaera. Na čast doktora Poljoprivredno-vrtlarskog fakulteta promovirani su: prof. dr Tiurin (Moskva), prof. dr Lohmann (Berlin-Buch), prof. dr Kielianowski (Varšava) i prof. dr Rodé (Moskva).

Zatim je jedan dan posvećen naučnom podmlatku uz predavanje prof. dra Teipela »O problemima naučnog podmlatka na Poljoprivredno-vrtlarskom fakultetu«. Isti dan su bile javne obrane disertacije.

U sklopu »Dana studenata« održan je referat »O ulozi mladeži u razvoju socijalističkog sela«.

Na završetku održala je na »Dan tehničkih suradnika« predavanje prof. dr Foderberg pod natpisom »O problemu kvalificiranja namještenika«.

Iza završenih predavanja i simpozija organizirana je posjeta pojedinim institutima fakulteta kao i zajednički sastanak, koji je ujedno bio i završetak proslave ovog fakulteta.

Za cijelo vrijeme trajanja proslave u vezi sa 150-godišnjicom Humboldt univerziteta održane su osim vanredno interesantnih predavanja, simpozija i stručnih ekskurzija i mnoge druge priredbe i svečana primanja. Cijela proslava bila je vrlo pažljivo organizirana i sve se odvijalo po unaprijed utvrđenom planu.